



Royal Greenland suleqatigalugu saarullinnik uumatitsivinnik amerlanerusunik pilersitsisoqarnissaanik pilersaarusiortoqarnissaanik Naalakkersuisut peqquneqarnissaannik Inatsisartut aalajangiiffigisassaattu siunnersuut.

(Inatsisartuni ilaasortaq, Siverth K. Heilmann, Atassut)

(Siullermeerneqarnera)

Qujanaq Inatsisartunut ilaasortaq Siverth K. Heilmann siunnersuummut.

Demokraatiniit aalisartut aalisakkeriviillu tatigisorujussuuagut. Tulluusimaassaagut, nunarsuarmi aalisarnermi aammalu aalisakkanit aningaasarsiornermut pitsaanerpaat ilagimmatigut. Taamatut oqareerluta, isumaqatigaarput, aalisakkanik suliareqqiinnermut pitsaanerusariaqartugut, aningaasanik suli amerlanernik isertitsiniassagatta.

Tassa ima isumaqarpoq, uagut politikikkut ingerlatsinernut niuernikkullu isummernernut akuliuppallaarnaveersaassagatta. Akerlianilli pitsaanerpaanik sinaakkuteqartitsissalluta, aalisartut, ingerlatsiviit inuiaqatigiillu aningaasarsiorluarnissaannut. Taamaattumik peqqusiissanngilagut saarullinnik uumatitsiviit amerlanerunissaannik - akerlianilli akuliutissanngilagut akueralugugu, tamanna aalisarnermik ingerlataqartut aalajangigassaringaat. Qularutiginnilarput, niuerneq pitsaasuuppat, ingerlataqartut ilimanarluinnartutut isigigunikku atorluaassaqaarumaaraat.

Tamanna tunngavigalugu isornartoqartilaarparput, ilumut isumassarsiaq pitsaasuunerssoq, uagut politikkerit aalajangerutsigu, saarullinnik uumatitsivinnik pilersitsinissamut pilersaarusiornissaq. Mianersussaagut pituttornaveersarluta, qanoq saarullit aningaasarsiuutigissanerlugit ullumikkumut naleqqiullugu. Isumaqatigaarput, aaqqiissutissanik nassaarneq pingaartuusoq, qanoq ililluta saarullik tamaat atorsinnaaneripput aammalu qanoq maani nunatsinni aalisagaq suliareqqaarneqarsinnaanersoq aningaasanik amerlanernik iseretitsissutaasussanngorlugu.

Kissaatiginartikkualarparput, ataatsimiititaliami taassuma isiginnittariaatsip ukkatarineqarnissaa, aammalu tamanna tunngavigalugu ataatsimoorussamik allannguutissatut siunnersuuteqarnissarput.

Taamatut paasinnilluta siunnersuutip suliareqqinnissaanut Aalisarnermut-, Piniarnermut- aamma nunalerinermullu ataatsimiititaliamut innersuussutigaarput.